

三日是高明者舉進住坐無志氣者他處遊行次驗腳色公據  
詳察緣由若不明其間恐有隱匿詐偽之人不穩便更防一  
等道人愚徒之輩奸詐之人一言相惑點污徒眾破除庵舍常  
談訓誘便合遣出若有投庵出家者不得擅便引進先觀道氣  
次看悟道或祖上家風善惡及自己德行淺深高明者攜之愚  
蠢者抑之或於庵中幹辦等事先問庵主次與合堂道眾評論  
出家無問早晚不擇老幼但泄理明心者堪爲上人也凡有化  
道不得詐託師家名目亦不得私心指託庵舍取要檀越等物  
自己用度便是私瞞常住上天鑒察必無輕譴故茲榜式各宜  
知悉

道藏輯要

全真清規

卷

張集二

今日 日示

朗然子家書

夫人身難得中土難生正法難遇全此三者幸莫大焉况今諸  
仙出世立登天之梯堯渡苦海之舟船默露玄機不可不應猛  
悟光陰迅速頓知世境浮囂念念慕古聖之玄風頭頭效達人  
之返樸隨擲火坑便步清涼之地解脫塵勞永居自在之鄉莫  
待老之將至甯知身後如何既悟須當斬釘截鐵休教漉水拖  
泥改非從是一刀兩段若不斷於貪嗔怎得心田清靜須當絕  
乎愛慾乃得法器圓成不了真心終歸幻夢掣開愛網跳出凡  
籠便超紫府仙鄉永脫紅塵異趣一條藜杖汎雲水之三千半

片衲衣訪洞天之十二清靜門中無爲路上法味滋身洞然眞  
樂宴坐茅堂飲清風而推開玄妙之門閑居土屋賞明月而把  
握陰陽之髓雖則妻妾兒孫如同棲之宿鳥金銀珠玉似過眼  
之浮雲是以喜捨家緣便歸洞府斷絃不續潑水難收父母妻  
男各從方便自今如陌路之人永作他鄉之客彼出家者並無  
怠惰之心今在家者一任分飛之意故所願也謹奉鄙書伏惟  
珍重

道藏輯要

全真清規

卷

張集二